

«Vegni per tedlar»

Viva discussiun davart la catsch'aulta e la catscha d'atun a Glion

DA HANS HUONDER / ANR

L'iniziativa encounter la catscha d'atun procura per ina viva discussiun davart la catscha el cantun Grischun. In ni l'auter tabu savess curdar egl avegnir. En siat loghens sescuntran il president dalla regenza,

cusseglier guvernativ *Mario Cavigelli*, ed il niev cau digl Uffeci da catscha e pesca dil cantun Grischun, *Adrian Arquint*, cun la populaziun, oravontut denton culs catschadurs. Il gliensdisdis sera ei quei stau il cass a Glion. El center ei la damonda davart la reduziun dil grond diember da tscharvas

stada. Duein vadials vegnir sittai egl avegnir era il settember ni duei ei dar egl avegnir ina suletta patenta per la catsch'aulta e la catscha d'atun? Ils impuls ch'ils dus exponents han obtenui duein vegnir analisai il proxim temps.

➤ PAGINA 3



Duein vadials tscharva vegnir sittai egl avegnir era il settember?

FOTO E. MONN

Ils catschadurs han svidau il puppen

Orientaziun e discussiun davart la catscha cun Mario Cavigelli ed Adrian Arquint a Glion

DA HANS HUONDER / ANR

Catschaduras e catschadurs dalla Surselva, mo era persunas che van buc alla catscha, han giu la caschun da svidar il puppen il gliendisdis sera. Il president dalla regenza, cusseglier guvernativ Mario Cavigelli, ed il niev cau digl Uffeci da catscha e pesca dil cantun Grischun, Adrian Arquint, ein stai a Glion per tuccar il puls dalla populaziun. Igl ei stau ina da siat scuntradas d'informaziun e discussiun ch'il departament ed uffeci han organisau el cantun Grischun. Rodund 250 persunas ein serendidas ell'aula dalla casa da scola digl emprem marcou spel Rein per s'informar e far propostas per midadas vid las direktivas da catscha. In dils motivs principals da quellas scuntradas ein las iniziativas dil pievel ch'en il mument en discussiun e tractaziun el cantun Grischun. «Ellas ein buca bunas per la catscha grischuna. Ellas procuran per lingias grassas pauc plascheivlas e svegian malsegirtads», di Cavigelli ch'ei cau dil departament da baghegier, traffic e forestalessier. En siu plaid introductiv constatescha il president dalla regenza che la populaziun ei sedistanziada ils davos onns dalla natura: «Biars san insumma nuot davart la catscha. Igl ei nies pensum da declarar che la catscha seigi buc in hobi ni in plascher, mobein in pensum.» Medemamein ha el tematisau il luf: «Bia glieud giavischia il return da quel senza reflectar pli fett. Per quei animal drova ei ina via prudenta, negina autogiustia.» Cavigelli ei denton era seprofundaus el regal da catscha sez: «El ei cheu per vegnir nezegiaus. Mint'onn vegg recalgtau rodund 300 tonnas carn da selvaschina. Quei ei bio e persistent.»

«Nus essan vegni per tedlar»

En siu pledoyer fett engaschau en favur dalla catscha libra el cantun Grischun ha Cavigelli denton era puntuau: «Buca tut



Il niev cau digl Uffeci da catscha e pesca dil cantun Grischun Adrian Arquint (sen.) ed il president dalla regenza grischuna, cusseglier guvernativ Mario Cavigelli, ein sescuntrai il gliendisdis sera a Glion cun catschaduras e catschadurs, mo era persunas che van buc alla catscha. Tema da discussiun: Igl avegnir dalla catscha el cantun Grischun.

FOTO H. HUONDER

ei optimal. Nus essan aviarts per novas ideas che gidan a rinforzar la catscha da patenta. Ira dallas finamiras ei d'augmentar il diember da tscharvas sittadas il settember.» Fett competent e plausibel ha Arquint tematisau il sistem da catscha actual: «Aschibein sco ils catschadurs ha era igl uffeci in'incumbensa en quei sistem. La vesta da Cuera anora ei magari empau pli complexa che l'egliada en in sulet territori da catscha.» El enumeresa entginas mesiras ch'en vegnidias pridas ils davos onns sco emprovas per miiglior la catscha sin tscharvas il settember: «D'ina vart ei quei las intervenziuns els asils da catscha, l'interrupziun dalla

catsch'aula ni era la catscha da vadias e lontschets cun ina lunghezia da corna sur las ureglas en territoris d'emprova.» Per Arquint eis ei clar: «Sittar vadias e lontschets cun ina corna che varga si las ureglas il settember ha era sias consequenzas. Vaccas che piardon lur vadias en quei temps sedeportan auter ils onns vegnents e lontschets che vegnan sittai davantan buca pli taus da dus ni dapli onns. Igl ei era ina damonda dalla persistenza.»

Ei va era per daners

Ella discussiun suandonta all'orientaziun da Cavigelli ed Arquint ein pliras persunas s'exprimidas, fagend propostas era

per midadas dallas prescripcziuns da catscha. Per l'entschatta da quella ei in representant dil comite dall'iniziativa encounter la catscha d'atun s'exprimius: «Quella discussiun ch'ei uss ei stada ina dallas finamiras dall'iniziativa. Sche quella discussiun fuss vegnida avon sco giavischau da nus pliras ga fuss l'iniziativa buca vegnida.» Il scop dall'iniziativa seigi quel da procurar ch'ei vegni sittau dapli tscharvas il settember: «La catscha d'atun ei adina vegnida propaganda sco instrument dalla regulaziun fina. Sittar 25 pertschien dallas tscharvas il novembre e december ei denton negina regulaziun fina pli.» Medemamein constate-

scha el ch'il recav da rodund 600 000 francs entras la catscha d'atun seigi in ulterior motiv dil cantun d'arranschar quella catscha. La preschientscha pli e pli gronda dil luf, arver ils asils per l'emprema jamna dalla catsch'aula, reglar da niev ils cuosts per vaccas bletschas sittadas il settember, sittar vadials il settember, scaffir ina patenta unita per catsch'aula e catscha d'atun, lubir ils tschiervs da cruna damai ch'ei ha gria da memia tscharvas ni era turnar anavos sin l'avvertura dalla catsch'aula ils 9 da settember cun in temps da catscha senza interrupziun ein stai temas da discussiun. Igl ei denton era vegni puntuaal ch'ei seigi buca reussiu da metter la catscha d'atun en ina megliera gisch. Enstagl da contonscher quella finamira seigi ei vegni polarisau. Las instanzas cantunales scieng stadas cun peis e mauns encunter biaras ideas dils catschadurs, ussa vonzeivi seigien ins promts da vegnir a tedlar tgei che quels hagien da dir.

Agir persistent

«Nus savein mo sittar ils animals che nus vesin e buc ils auters», ha in catschadur manegiau. Il medem ha tematisau ils asils: «Quels vegnam serrai giu dils catschadurs sin tuttas varts aschia che la selvaschina vegn buca pli ora.» Cheutras maunchi era il traffic dils animals d'in asil a l'auter. In auter ha manegiau ch'ei seigi da far tut il pusseivel ussa per ch'ils iniziants retilien lur iniziativa. Arquint ha schau flessegjar en ella discussiun aspects ecologics: «Igl ei impurtont da far pass che garanteschan la persistenza della catscha, vul dir agir aschia ch'il disturbì ha buc in effect negativ sin las tscharvas ils onns vegnents.» Cavigelli ha sincerau ch'ins vegni ad examinar las propostas ed ideas suenter la turnea da discussiun. Adattaziuns seigien pusseivlas ellas prescripcziuns gia en vesta alla catscha vegnenta, outras pretendien eventualmein ina midada dalla lescha da catscha.

CLAUSTRA GLION

Nova responsabla per las medias

(cp) Sandra Koch Gross daventa la nova responsabla dil post da medias dalla claustra da Glion. Ella dispona d'ina reha experientia sil camp da marketing e lavour publica. Era enconuscha ella già la Surselva. Dapi l'entschatta dad uonn eis ella la persona da plidentar per tuttas damondas dals medias alla claustra da Glion.

Desister da cornas a favur da la selvaschina

(rr) Tschertgar cornas è in grond disturbì per la selvaschina che po avair consequenzas fatalas per quella, cunzunt suenter in dir enviern. L'Uniu chantuala da chatschaders ha fatg in appell en il «Fegl ufficial dalla Surselva» da betg ir a tschertgar cornas ed uschia dar il rauas che la selvaschina dovrà uss. Il guardia selvaschina *Arnold Caminada* beneventa quest appell. Er sche la naiv fiss davent immediatamain fiss la selvaschina anc adina fitg flaivla. Ella dovrà anc intignis mais da sa revognir dals strapatschs da l'enviern passà, declera el. Ir per ils guauds enturn per tschertgar cornas disturbance. La selvaschina vegnia stgatschada e quai possia esser la sentenza da mort per ella. Sch'insatgi vegnia traplè durant il tschertgar cornas dettia quai ina tgisa, di Caminada. Sch'insatgi chattia tar ina spassegiada sin ina senda da viandar u via da funs ina corna, lura possia el dentant prender quella senza avair tema ch'i detta ina tgisa.

PUGN DA VESTA

DA HANS HUONDER / ANR

La catscha ei sut squetsch. Buca mo el cantun Grischun, mo cheu specialmein il mument. Duas iniziativas ein en discussiun. La decisiun davart quellas vegn a dar la direcziun per la catscha dils proxims onns. Entochen che la proxiima iniziativa vegn. Da quei ein las instanzas politicas ed administrativas dil cantun pertschartas. Da quei duessen denton era ils catschadurs prender plaunsiu notizia. Denter quels dat ei denton aunc adina tals che manegian ch'il regal da catscha e lur territori da catscha s'audi sulettamein ad els. La vusch dil catschadur ei denton buca pli decisiva che quella d'in vegan ni amitg dil luf. E dar l'empudientscha uss a quellas discussiuns als iniziants encounter la catscha d'atun ei contraproductiv. Igl ei falliu d'encurir culponts il mument. Las discussiuns che han liug ussa publicamein – cun participaziun era da persunas che van buc alla catscha – vegnan tard, mo buca memia tard. Ussa ha ei num volver en las mongias e märschar communablamein anavon cun la finamira da salvar la catscha grischuna. Alternativas dat ei paucas. Enstagl dalla catscha da paten-

Sittar tgei, cu e nua?

ta ei quei la catscha da revier. Adattaziuns dil sistem da catscha actual ein necessarias, mo memia biars detags astgan buca davent part dalla «battaglia publica».

Il president dalla regenza, cusseglier guvernativ Mario Cavigelli, ed il cau digl Uffeci da catscha e pesca, Adrian Arquint, ein sin turne atras il Grischun. La finamira: Tedlar ils meinis e las ideas dallas catschaduras e dils catschadurs en connex cun l'iniziativa encounter la catscha d'atun. L'idea sco tala da quellas scuntradas ei fett buna, aschilunsch che las opiniuns caten la finfinala era ureglas attenatas. Propri credibels ein ils exponents dalla catscha dil cantun denton pér quei mument ch'els meinan ina ni l'autra idea sin via concreta elles prescripcziuns ni ella lesta da catscha. A Glion sco en auters loghens han las catschaduras ed ils catschadurs saviu svidar il puppen. Quei han ils pli biars fatg cun votums constructivs.

Da principi ein las ideas discutadas il gliendisdis sera a Glion buca novas. Il sulet consens che regia denter ils catschadurs ei quel ch'igl ei da sittar e reducir



catscha ir a catscha dil november entochen Nadal per sittar las tscharvas ch'en aunc buca sittadas. Ussa ha ei num anflar la fuorma magica: Sittar tgei, cu e nua? Vadials? Settember ni november? Els asils ni buc?

Ei drova uss ina gronda unitad denter ils catschadurs e la promtadad dallas instanzas cantunales d'anflar vias prudentas e pragmáticas per dar il damogn al grond diember da tscharvas. Mo lu san quell'iniziativa e quella davant l'etica da catscha vegnir cum-battidas cun success. Emozions vegnan a giugar in'impurtonta rolla en quei cumbat da votaziun ed emozions ein quellas ch'en oz decisivas. Ils catschadurs sezs ston empruar da declarar alla populaziun il senn e la necessitat dalla catscha. Quei sa negin auter far. Els ston denton era viver quella tenuta duront il temps da catscha e gliez ei deplorablamein buc adina il cass. In ei cert: Ei vegn buc ad esser sempel da perschieder cun buns arguments, pertgei maletgs da vadias ed anseuls sittai, han silmeins ton effect tiels adversaris dalla catscha.

hans.huonder@anr.ch